

Segun Tico Croes di AVP

HULANDA A MANDA NEL ODUBER

BEK PA HASI SU HUISWERK

Encuanto independencia

ORANJESTAD (APA) ---E parlamentario Sr. Tico Croes, a bisa cu durante e último simannan por a tende hopi discusion encuanto e fecha di 1996, e acuerdo di Mesa Rondó di 1983, e derecho di autodeterminacion, e dignidad di'e pueblo di Aruba, nos orguyo y encuanto independencia.

Contrario na e forma cu Gabinete Eman a mira e fecha di 1996 y e independencia como un asunto di sumo importancia y cu ta requerí un debido preparacion riba tur terreno, y cu semper dilanti di Hulanda a keda para riba e punto di bista, cu al fin y al cabo ta pueblo di Aruba lo mester dicidi si y ki dia e kier su independencia, ta mira awor un gobierno bao guía di Promé Minister Oduber, cu ta laga e derecho sagrado di nos pueblo cai, pa sin ningun preparacion y na un forma masha emocional, ta hisa benta bai Hulanda, pa cuminsá negociá riba e asunto aki, sin nunca consultá cu ningun instancia of e pueblo di Aruba.

Promé cu e biahe di Premier Oduber pa Hulanda, AVP a entregá un mocion na Staten, den cual un blaha mas ta ancla e derecho sagrado di autodeterminacion di'e pueblo Arubano. Pero grandi tabata e sorpresa, ora cu e integrantenan di MEP y nan 'brothernan' den gobierno a vota contra e mocion di AVP, apesar cu na 1985, bao guía di nan lider, difunto Betico Croes si MEP a vota pro y a sostené e mocion cu e mesun contenido y meta. Otro ehempel di con e partido MEP, bao influencia di'e partido PPA, ta bandoná e pensamiento y programa di accion di su difunto lider Betico Croes. Sinembargo Oduber a bai Hulanda pa bai negociá independencia di Aruba na 1996, cuesta loke cuesta, pero te ainda no a duna un splicacion exácto di su deliberacionnan na Hulanda. Y pueblo ta puntra su mes, ta kiko Oduber por a palabrá na Hulanda.

E único cos cu nos sa, ta cu Hulanda a manda Oduber bek pa bai haci su 'huiswerk', promé cu e bolbe bai papia di'e asunto aki, segun Tico Croes.

AVP ta contento cu gremionan sindical, comercial y otronan, a cuminsá pone mas atencion na un asunto di vital importancia pa Aruba, manera nos independencia, fihando nan posicion den esaki. Asina tur e gremionan aki ta contribuí na formacion di un punto di bista nacional tocante e futuro estructura estatal di nos país.

Den e foro organizá pa FTA dia 12 di Juli último, a salí na cla, cu independencia na 1996 pa MEP ta un hecho. Pa MEP, ta e acuerdo será na Hulanda na 1983, ta sagrado y no e derecho di autodeterminacion di'e pueblo di Aruba.

Y pesey MEP ta mira e referendum consultativo cu lo tene na 1994, como un simpel formalidad y nada mas. Cu otro palabra, nos pueblo no tin otro alternativa, cu esun di aceptá independencia na 1996. Y cu e ponencia aki, MEP y su 'brothernan' den gobierno, ta aceptá atrobe e presion cu Hulanda a imponé riba nos na 1983, pa Aruba por a haya su Status Aparte y guli manda'abao, loke Hulanda kier a imponé riba nos. Segun MEP, si nos no aceptá esaki, nos ta perde nos dignidad y nos honor, sin puntra si e independencia realmente lo ta mihó pa Aruba y hasta sin puntra pueblo di Aruba, si e ta deseá su independencia na 1996. Anto cu esaki, MEP ta aceptá e peor forma di colonialismo cu por existí.

En cambio, AVP su posicion for di 1981, ta cla y consistente. Esaki tabata y ta, cu e meta primordial ta e realizacion di nos Status Aparte y cu cualkier otro forma di estructura estatal, p.e. e independencia acordá cu Hulanda, lo mester ta suheto na y huzgá pa e pueblo di Aru-

ba, pasobra no ta Hulanda ni ningun otro país ta duna Aruba su estructura estatal. Ta e pueblo mester scohe esey e mes. Tampoco ta ningun partido político of político individual ta dicidi pa Aruba, aunke esey por costa e partido su honor of no. Ta e pueblo so y ningun otro, tin e derecho di autodeterminacion, esta e derecho sagrado pa dicidi pa su mes. Y tur hende conocé e posicion firme y consistente di AVP, for di relatonan di 1ste y 2de Kamer di Parlamento Hulandes y di mocionnan presentá den Staten di Antiyas y Eilandsraad di Aruba na 1985 y e mocion presentá den Staten di Aruba dia 30 di Mei 1989. Pa AVP, e derecho di autodeterminacion ta un derecho cu ta pertenecé único- y exclusivamente na e pueblo di Aruba.

Pa ehercé e derecho aki, pueblo mester - pa medio di un referendum - tuma un decision directo encuanto su futuro estructura estatal. E derecho di autodeterminacion ta un proceso constante pa mehorá nos calidad di bida y ta den e proceso aki, Nacionnan Uní ta duna guía pa loke ta alternativanan cu nos pueblo tin na su disposicion. E alternativanan aki ta, independencia, asociacion liber of e integracion di un país soberano cu un otro país soberano. E conclusion lógico ta, cu independencia no ta e único alternativa pa Aruba. Y pa Aruba, den e situacion económico, político y social actual, e opcionnan lógico ta, mantené Status Aparte of busca independencia. Y pa scohe entre Status Aparte y Independencia, lo mester wak, con e calidad di bida ta den un di'e dos opcionnan aki y compará pa mira, ta den cual di dos nos ta mihó pará. E calidad ta bida ta reflehá básicamente e balornan democrático den cada instante y cada situacion di nos bida diario, awor y den futuro. Esaki tin di haci cu e forma cu bo ta worde tratá den y dor di gobierno.